

MESYUARAT KEDUA, PENGGAJ KEEMPAT
PARLIMEN KEEMPAT BELAS
2021

HARI SELASA : 2 NOVEMBER 2021

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 7, 13 HINGGA NO. 42)**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KE-EMPAT BELAS**

PERTANYAAN : JAWAB LISAN

**DARIPADA : YB TUAN YUSUF BIN ABD. WAHAB
(TANJONG MANIS)**

TARIKH : 02 NOVEMBER 2021 (SELASA)

SOALAN

TUAN YUSUF BIN ABD. WAHAB [TANJONG MANIS] minta **MENTERI PENGANGKUTAN** menyatakan adakah Kementerian akan mengadakan semula Program Satu Komuniti Satu JPJ (SKSJ) di kawasan luar bandar kerana program ini telah banyak membantu masyarakat luar bandar untuk mendapatkan lesen memandu. Masalah kekangan pergerakan semasa PKP telah menyulitkan masyarakat luar bandar untuk mendapatkan lesen memandu, termasuk penduduk Parlimen Tanjong Manis.

JAWAPAN

Tuan Yang di-Pertua,

Kerajaan melalui Kementerian Pengangkutan telah mengumumkan inisiatif Bantuan Lesen Memandu Prihatin (BLMP) yang antara lain bertujuan meringankan beban kewangan golongan yang tidak berkemampuan terutamanya di kawalan luar bandar dan pedalaman untuk memperolehi lesen memandu kelas motosikal B2. Selain itu, program ini juga bertujuan memberi kesedaran kepada golongan ini mengenai peraturan dan aspek keselamatan jalan raya melalui kehadiran ke sesi kelas, latihan dan ujian seterusnya membantu golongan-golongan

NO. SOALAN: 7

ini untuk mencari peluang-peluang pekerjaan setelah memperolehi lesen memandu kelak.

Untuk makluman, pelaksanaan program ini hanya diperuntukkan kepada permohonan yang diterima daripada pihak-pihak yang berikut:-

- (i) agensi Kerajaan yang terlibat dengan pembangunan masyarakat;
- (ii) agensi yang bertanggungjawab dalam menyelaras sumbangan bantuan Kerajaan kepada masyarakat; atau
- (iii) pemimpin masyarakat yang dilantik atau diiktiraf oleh Kerajaan untuk menyuarakan hasrat masyarakat.

Program ini memfokuskan kepada golongan B40 warganegara Malaysia, berusia 16 tahun ke atas di seluruh Malaysia yang belum memiliki lesen memandu motosikal kelas B2. Individu yang berminat akan dikehendaki menjalani program ini selama 3 hingga 5 bulan dengan kerjasama Institut Memandu di seluruh Malaysia bagi tujuan sesi latihan, kelas dan ujian.

Oleh itu, bagi tujuan pelaksanaan program ini, permohonan boleh dikemukakan kepada Pejabat JPJ yang terdekat termasuk melibatkan kawasan Parlimen Tanjong Manis.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI PANGLIMA HAJAH AZIZAH
BINTI DATUK SERI PANGLIMA HAJI
MOHD DUN [BEAUFORT]**

TARIKH : 2 NOVEMBER 2021 (SELASA)

SOALAN

DATUK SERI PANGLIMA HAJAH AZIZAH BINTI DATUK SERI PANGLIMA HAJI MOHD DUN [BEAUFORT] minta **MENTERI TENAGA DAN SUMBER ASLI** menyatakan jumlah aduan berkaitan isu peningkatan bil elektrik sehingga menimbulkan beban yang teruk kepada rakyat di Sabah sepanjang tempoh 2021.

JAWAPAN

Tuan Yang di-Pertua,

Jumlah aduan dan pertanyaan oleh pengguna-pengguna elektrik di Sabah khususnya berkaitan isu bil elektrik yang diterima oleh Suruhanjaya Tenaga (ST) dari Januari sehingga 10 Oktober 2021 adalah sebanyak **434 aduan**. Pihak utiliti Sabah Electricity Sdn. Bhd. (SESB) pula telah menerima **93 aduan** dan **5,360 pertanyaan** antara bulan Jun sehingga September 2021 melalui panggilan telefon dan media sosial SESB berhubung isu bil elektrik pengguna.

Berdasarkan semakan oleh ST, terdapat dua (2) punca menyebabkan peningkatan aduan dan pertanyaan berkenaan bil elektrik yang tinggi bagi pengguna-pengguna SESB seperti berikut:

- i) SESB memberhentikan sementara pembacaan meter secara fizikal di tapak apabila Perintah Kawalan Pergerakan Diperketatkan (PKPD) dilaksanakan di beberapa kawasan di Sabah dan Labuan berikutan penularan wabak COVID-19. Ini menyebabkan bil elektrik secara fizikal berdasarkan bacaan meter sebenar yang diterima oleh pengguna pada bulan Ogos 2021 adalah lebih tinggi berbanding bacaan bil bulanan biasa memandangkan bacaan tersebut adalah untuk tempoh dua hingga tiga bulan; dan
- ii) SESB telah melakukan proses konfigurasi semula sistem pengebilan (*SAP Billing System Reconfiguration*) pada 1 hingga 26 Julai 2021 bagi membolehkan diskaun bil elektrik di bawah Pakej Perlindungan Rakyat Dan Pemulihan Ekonomi (PEMULIH) diberikan kepada pengguna-pengguna di Sabah. Proses ini telah menjejaskan pengoperasian sistem pengebilan dan menyebabkan penangguhan pengeluaran bil sebenar kepada pengguna.

Bagi menangani peningkatan aduan dan memudah cara urusan aduan boleh pengguna, SESB telah mengaktifkan bilik gerakan dan petugas *Careline* untuk beroperasi 24 jam sehari untuk merekod dan memberi penjelasan kepada semua pertanyaan berkenaan bil serta aduan yang diterima.

Sekian, terima kasih.

**PERTANYAAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DR. MASZLEE BIN MALIK [SIMPANG
RENGGAM]**

TARIKH : 2 NOVEMBER 2021 (SELASA)

SOALAN

minta **MENTERI KOMUNIKASI DAN MULTIMEDIA** menyatakan mengapakah mereka tidak membantu industri gusti profesional tempatan seperti APAC Wrestling untuk menayangkan perlawanan-perlawanan mereka di saluran milik kerajaan. Ini penting untuk membantu industri tersebut yang agak baru, namun berpotensi untuk berkembang kerana para pengusti profesional tempatan sudah mula dikenali dunia.

JAWAPAN

Tuan Yang Dipertua,

Untuk makluman Ahli Yang Berhormat, Kementerian Komunikasi dan Multimedia sentiasa menyokong pembangunan pelbagai industri sukan di negara ini terutama yang baharu dan berpotensi tinggi untuk dimajukan. Justeru, Kementerian ini melalui Jabatan Penyiaran Malaysia (RTM) **bersedia untuk membantu mengetengahkan mana-mana industri sukan termasuklah gusti profesional yang memerlukan sokongan dan promosi menerusi slot siaran atau *air time* yang disediakan.**

SUKAN RTM adalah saluran sukan pertama yang dilancar dan dimiliki sepenuhnya oleh RTM dengan tarikh penubuhannya pada 12 Jun 2018. Di awal penubuhannya, saluran SUKAN RTM ini menggunakan nama RTM SPORTS dengan memulakan siaran ujian pertamanya, secara eksklusif menerusi Platform MyFreeview Saluran 111 dan juga

melalui dalam talian internet (OTT) Myklik RTM, bersempena dengan Piala Dunia FIFA 2018.

RTM sentiasa memantapkan kandungan siaran SUKAN RTM dengan bahan-bahan siaran *in-house* serta lebih banyak siaran langsung kejohanan sukan tempatan dan antarabangsa sebagai usaha untuk terus menyalurkan informasi-informasi sukan terkini dalam dan luar negara secara konklusif serta eksklusif antaranya ialah UEFA EURO 2021, Sukan Sea Manila 2021 dan Sukan Olimpik Tokyo 2021. Tumpuan terus diberikan kepada kejohanan-kejohanan sukan bertaraf dunia samada tempatan atau luar negara yang menjadi kegemaran rakyat Malaysia dalam usaha Kerajaan memupuk minat serta mewujudkan rakyat yang sihat dan aktif bersukan.

Untuk itu pihak RTM bersedia untuk bekerjasama dengan mana-mana -mana persatuan sukan termasuk sukan gusti tempatan untuk dikembangkan ke peringkat lebih tinggi bagi mengisi *air time* atau slot saluran tersebut. Ia diharapkan dapat membantu membuktikan sukan gusti Malaysia juga setanding dengan luar negara asalkan ia badan sukan tempatan yang diiktiraf oleh kerajaan dan dikenali di peringkat Asia dan Antarabangsa.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : YB DATO' HAJI AHMAD NAZLAN BIN IDRIS
[JERANTUT]**

TARIKH : 2 NOVEMBER 2021 (SELASA)

SOALAN

DATO' HAJI AHMAD NAZLAN BIN IDRIS [JERANTUT] minta **MENTERI PELANCONGAN, SENI DAN BUDAYA** menyatakan rancangan Kementerian bagi membantu pengusaha atau pengendali pusat pelancongan ketika negara sedang memasuki fasa endemik agar mereka dapat beroperasi semula.

JAWAPAN

Tuan Yang di-Pertua,

1. Kerajaan telah melancarkan beberapa pakej rangsangan ekonomi seperti PEMULIH, PEMERKASA Plus dan PEMERKASA yang bertujuan untuk memulihkan ekonomi dan memastikan kesinambungan perniagaan sambil mengekalkan pekerjaan, terutamanya rakyat Malaysia. Antara bantuan khas yang diberikan kepada industri pelancongan yang terjejas akibat pandemik COVID-19 adalah seperti berikut:-

- (i) Bantuan khas *one-off* sebanyak RM3,000 kepada agensi pelancongan yang berdaftar dengan Kementerian Pelancongan, Seni dan Budaya Malaysia (MOTAC) termasuk syarikat-syarikat MM2H yang mempunyai lesen *inbound* di bawah MOTAC;
- (ii) Bantuan kewangan *one-off* RM500 kepada pemandu pelancong (Semenanjung Malaysia & Sarawak), manakala bantuan kewangan *one-off* sebanyak RM1,000 kepada pemandu pelancong (Sabah);
- (iii) Bantuan khas *one-off* sebanyak RM600 kepada pengendali inap desa di bawah Program Pengalaman Homestay Malaysia (MOTAC);
- (iv) Skim Pembiayaan Pelancongan PENJANA (PTF) berjumlah RM1 bilion yang bertujuan untuk menyokong perusahaan kecil dan sederhana (PKS) dalam sektor pelancongan;
- (v) Pelanjutan diskaun bil elektrik 10% bermula Oktober hingga Disember 2021 kepada pengusaha hotel, pengendali taman tema, pusat konvensyen, pusat membeli-belah dan pengusaha pelancongan;

NO. SOALAN : 15

- (vi) Pengecualian cukai pelancongan dan cukai perkhidmatan oleh pengusaha hotel sehingga 31 Disember 2021;
 - (vii) Penangguhan pembayaran ansuran cukai pendapatan bulanan oleh syarikat;
 - (viii) Sokongan kepada majikan menerusi Program Subsidi Upah iaitu kadar bantuan sebanyak RM600 setiap pekerja selama empat (4) bulan dan terhad sehingga 500 pekerja setiap majikan; dan
 - (ix) Bantuan Kewangan Geran Khas Prihatin sebanyak RM1,000 secara *one-off* kepada pengusaha spa dan pusat urutan kaki (PUK).
2. Selain daripada di atas, MOTAC juga telah mewujudkan insentif bagi membantu penggiat industri pelancongan untuk terus mampan walaupun terkesan teruk akibat dari pandemik COVID-19. Insentif yang ditawarkan tersebut adalah melalui pembiayaan kewangan seperti Skim Infrastruktur Pelancongan (SIP) dan Tabung Khas Pelancongan (TKP).
3. SIP diuruskan oleh Bank Pembangunan Malaysia Berhad (BPMB) yang menawarkan skop pembiayaan seperti berikut:
- (i) Pembelian tanah, pembinaan bangunan, mesin dan pelbagai aset yang berkaitan dengan pelancongan;
 - (ii) Modal kerja bagi syarikat yang terlibat dalam industri pelancongan; dan
 - (iii) Kerja-kerja pengubahsuaian dan naik taraf yang berkaitan dengan industri pelancongan.
4. Jumlah pembiayaan yang ditawarkan oleh SIP adalah bermula dari RM20 juta sehingga RM100 juta atau sehingga 80% daripada jumlah kos projek yang mana lebih rendah. Tempoh permohonan bagi SIP bermula pada 1 Januari 2021 sehingga 31 Disember 2023 atau tertakluk kepada kesediaan dana.

NO. SOALAN : 15

5. TKP pula diuruskan oleh Small Medium Enterprise Development Bank Malaysia Berhad (SME Bank). TKP menawarkan pembiayaan dalam bentuk modal kerja bagi menyokong perusahaan kecil dan sederhana (PKS) dalam sektor pelancongan supaya kekal berdaya maju semasa dan selepas COVID-19. Jumlah pembiayaan yang ditawarkan oleh TKP adalah bermula dari RM50,000 sehingga RM500,000. Tempoh permohonan bagi TKP bermula pada 1 Januari 2021 sehingga 31 Disember 2021 atau tertakluk kepada kesediaan dana.

6. Selain dari bantuan kewangan tersebut, MOTAC juga menyediakan insentif seperti Galakan Cukai kepada syarikat pengendalian pelancongan bagi merancakkan kembali aktiviti pelancongan serta membantu syarikat untuk meneruskan kelangsungan dan meringankan beban ke atas perniagaan pasca COVID-19. Insentif galakan cukai ini telah ditambahbaik dan dilanjutkan untuk tempoh dua (2) tahun lagi iaitu bagi tahun taksiran 2021 sehingga tahun taksiran 2022.

7. MOTAC juga turut menyediakan bantuan bukan kewangan kepada penggiat industri pelancongan yang terjejas berikutan penyebaran COVID-19 seperti berikut:

- (i) Kelonggaran Berkaitan Kompaun;
- (ii) Pengecualian Fi Kepada Pengusaha Pelancongan dan Pemandu Pelancong; dan
- (iii) Kelonggaran Syarat Lesen Kepada Pengusaha Pelancongan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE EMPAT BELAS TAHUN 2021**

PERTANYAAN : LISAN

DARIPADA : DR AZMAN BIN ISMAIL [KUALA KEDAH]

TARIKH : 2 NOVEMBER 2021 (SELASA)

SOALAN

DR AZMAN BIN ISMAIL [KUALA KEDAH] minta **MENTERI PERTANIAN DAN INDUSTRI MAKANAN** menyatakan spesies ikan, sotong dan lain-lain hidupan laut yang telah pupus atau hampir pupus di perairan Malaysia dalam tempoh 3 dekad terakhir. Apakah langkah-langkah Kementerian untuk mengatasi masalah kepupusan spesies ini.

JAWAPAN

Tuan Yang Di Pertua,

Untuk makluman Ahli Yang Berhormat, bagi mengatasi masalah kepupusan spesis ini, Kementerian Pertanian dan Industri Makanan (MAFI) telah melaksanakan beberapa langkah iaitu:

- a) Memperkenalkan dasar pengezonan semula kawasan penangkapan ikan yang melibatkan 4 buah negeri di Pantai Barat Semenanjung Malaysia iaitu Pulau Pinang, Kedah, Perak dan Selangor;
- b) Sistem pelesenan vesel telah dilaksanakan untuk mengawal daya usaha tangkapan agar sumber dapat dieksploitasi secara mampan;
- c) Mengurus perikanan melalui pendekatan ekosistem (*ecosystem approach to fisheries management* – EAFM) yang melibatkan kerjasama yang holistik dengan pihak yang

berkepentingan termasuk komuniti nelayan, agensi-agensi Kerajaan, badan bukan kerajaan (NGO) dan universiti;

- d) Mewartakan kawasan refugia perikanan yang bertujuan untuk melindungi induk ikan dan berfungsi sebagai nurseri kepada anak-anak ikan. Dua lokasi dijadikan sebagai kawasan refugia iaitu di Kuala Baram, Sarawak (Udang Laut) dan Tanjung Leman, Johor (Udang Karang/Lobster). Pewartaan kawasan refugia ini dijangka akan meningkatkan sumber perikanan di kawasan tersebut pada jangka masa panjang;
- e) Menguatkuasa penggunaan saiz mata pukat keroncong tidak kurang daripada 38mm dan melabuhkan tukun-tukun tiruan bagi meningkatkan produktiviti biologi dan sumber perikanan pesisir pantai;
- f) Pembekuan sementara ke atas semua permohonan lesen baharu vesel zon A, B dan C bagi mengawal eksploitasi sumber secara berlebihan;
- g) Memperkenalkan dan menggunakan alatan berteknologi seperti *Juvenil and Trash Excluder Device* (JTED) dan pemasangan alat *Automatic Indification System* (AIS) ke atas semua vesel pukat tunda zon B dan C bagi tujuan pemantauan pergerakan vesel;
- h) Menjalankan program *Monitoring, Control and Surveillance* (MCS) bagi mengawal pelanggaran syarat lesen termasuk pencerobohan kawasan sama ada daripada vesel penangkapan ikan tempatan atau asing; dan
- i) Pewartaan sebanyak 42 taman laut untuk tujuan pemuliharaan biodiversiti marin dan pengekalan sumber perikanan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN ANYI NGAU (BARAM)

TARIKH : 2 NOVEMBER 2021 (SELASA)

SOALAN

TUAN ANYI NGAU minta **MENTERI KANAN PENDIDIKAN** menyatakan berapa sekolah di Sarawak amnya dan di Baram khasnya yang belum mempunyai tapak yang sah (jika ada). Nyatakan implikasi pembangunan sekolah yang tidak mempunyai tapak yang sah atau tapak yang tidak sah. Nyatakan bilangan sekolah tidak sah di Baram (jika ada) dan apakah tindakan penyelesaian oleh pihak Kementerian.

JAWAPAN

Tuan Yang di-Pertua,

Kementerian Pendidikan Malaysia (KPM) menyedari bahawa masih terdapat tapak sekolah yang belum ditukar hak milik kepada Pesuruhjaya Tanah Persekutuan (PTP). Dalam hal ini, KPM komited untuk melaksanakan pemutihan tanah bagi semua sekolah supaya projek pembangunan khususnya penggantian penuh, menaik taraf bangunan atau pembinaan blok tambahan dapat dilaksanakan di sekolah tersebut.

KPM telah mengenal pasti sebanyak 598 sekolah berada di atas tapak bukan hak milik PTP di negeri Sarawak. Daripada jumlah tersebut, terdapat 54 sekolah di kawasan Baram yang berada di atas tapak bukan hak milik PTP.

Untuk makluman Ahli Yang Berhormat, berdasarkan Garis Panduan Penyediaan Rancangan Malaysia Ke-12 (RMKe-12) 2021-2025 yang dikeluarkan oleh Unit Perancang Ekonomi (UPE), Jabatan Perdana Menteri (JPM), mana-mana tapak sekolah yang belum berstatus hak milik PTP atau badan berkanun Persekutuan, pelaksanaan projek pembangunan tidak dapat dipertimbangkan oleh agensi pusat.

Dalam hal ini, KPM komited untuk memastikan semua tapak sekolah tersebut ditukar status kepada hak milik PTP dengan membuat perolehan tapak mengikut syarat-syarat yang ditetapkan oleh Jabatan Ketua Pengarah Tanah dan Galian Persekutuan (JKPTG) dan kerajaan negeri.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN

DARIPADA : TUAN SIM CHEE KEONG [BUKIT MERTA JAM]

TARIKH : 2 NOVEMBER 2021 (SELASA)

SOALAN

TUAN SIM CHEE KEONG [BUKIT MERTA JAM] minta **MENTERI KEWANGAN** menyatakan statistik dan jumlah cukai daripada perjudian di negara kita dari tahun 2010 sehingga kini. Nyatakan pecahan penggunaan wang cukai tersebut.

JAWAPAN

Tuan Yang di-Pertua,

Terima kasih Yang Berhormat di atas soalan yang telah dikemukakan.

Tuan Yang di-Pertua,

Untuk makluman Yang Berhormat, jumlah kutipan cukai daripada sektor perjudian dari tahun 2010 sehingga September 2021 adalah seperti berikut:

| Tahun | Kutipan Cukai (RM) |
|-------|-----------------------|
| 2010 | 2.47 Billion |
| 2011 | 2.63 Billion |
| 2012 | 2.69 Billion |
| 2013 | 2.65 Billion |

| | |
|----------------------------|--------------|
| 2014 | 2.59 Billion |
| 2015 | 2.61 Billion |
| 2016 | 2.51 Billion |
| 2017 | 2.35 Billion |
| 2018 | 2.62 Billion |
| 2019 | 3.43 Billion |
| 2020 | 1.72 Billion |
| Sehingga September 2021 | 0.56 Billion |

Tuan Yang di-Pertua,

Selaras dengan Perkara 97(1) Perlembagaan Persekutuan, semua hasil duti dan cukai yang dikutip oleh Kerajaan Persekutuan akan dimasukkan ke dalam Kumpulan Wang Disatukan Persekutuan.

Sehubungan itu, Kerajaan Persekutuan akan menggunakan hasil daripada Kumpulan Wang Disatukan bagi membiayai perbelanjaan Kerajaan yang meliputi pelbagai sektor.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : LISAN

**DARIPADA : DATO' SERI HAJI IDRIS BIN JUSOH
[BESUT]**

TARIKH : 2 NOVEMBER 2021 (SELASA)

SOALAN

DATO' SERI HAJI IDRIS BIN JUSOH [BESUT] minta **MENTERI PERTANIAN DAN INDUSTRI MAKANAN** menyatakan apakah perancangan jangka pendek Kementerian untuk meningkatkan hasil pertanian, khasnya dalam memastikan pengeluaran makanan negara mencukupi untuk memenuhi keperluan semua lapisan masyarakat.

JAWAPAN

Tuan Yang Di Pertua,

Untuk makluman Ahli Yang Berhormat, matlamat utama Pelan Tindakan Dasar Sekuriti Makanan Negara 2021-2025 (Pelan Tindakan DSMN) adalah memastikan kelangsungan bekalan makanan yang cukup, selamat, bernutrisi dan mampu beli secara berterusan kepada rakyat.

Selaras dengan itu, strategi jangka pendek dan jangka sederhana yang dirangka menerusi Pelan Tindakan DSMN memberi tumpuan kepada usaha untuk menjamin kestabilan rantai bekalan, terutamanya kelancaran aktiviti pengeluaran makanan. Antaranya, memperluaskan adaptasi teknologi dalam sistem makanan, selain memperkukuh serta menambahbaik infrastruktur dan fasiliti sedia ada sebagai langkah pragmatik untuk meningkatkan kecekapan dan produktiviti sistem ini, berteraskan skala ekonomikal. Inisiatif yang dilaksanakan termasuk pembangunan pusat aktiviti lepas tuai, pusat pengembangan akuakultur serta Program Smart *Sawah* Berskala Besar (SMART SBB).

Usaha-usaha untuk meningkatkan hasil pertanian bagi memastikan pengeluaran makanan negara mencukupi, secara khususnya akan direalisasikan menerusi perancangan jangka pendek bagi tempoh satu (1) hingga dua (2) tahun di bawah Dasar Agromakanan Negara (DAN) 2.0 yang merangkumi inisiatif untuk:

- (i) memperkukuhkan keusahawanan makanan dan inovasi teknologi makanan;
- (ii) meningkatkan tahap kesedaran kehilangan dan pembaziran makanan di sepanjang rantai nilai melalui pelaksanaan program berstruktur;
- (iii) meningkatkan penglibatan holistik dengan sektor swasta dalam usaha pemerkasaan penyelidikan, pembangunan, pengkomersialan dan inovasi (R&D&C&I) bagi memacu

SOALAN NO : 19

kesinambungan pembangunan teknologi baka dan/atau produk baharu;

- (iv) memperkenalkan skim insurans terhadap penyakit berjangkit;
- (v) menyediakan insentif bagi penghasilan bahan makanan ternakan tempatan untuk kegunaan domestik; dan
- (vi) menggalakkan sektor swasta untuk meningkatkan penggunaan bahan mentah/input daripada sumber tempatan melalui pakej insentif.

MAFI yakin strategi-strategi jangka pendek yang dirangka di bawah Pelan Tindakan DSMN dan DAN 2.0 akan menyumbang dalam meningkatkan produktiviti sistem makanan, selain menjamin pengeluaran makanan negara mencukupi bagi memenuhi keperluan semua lapisan masyarakat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : YB DR ONG KIAN MING [BANGI]

TARIKH : 2 NOVEMBER 2021

SOALAN

YB DR ONG KIAN MING [BANGI] minta **MENTERI TENAGA DAN SUMBER ASLI** menyatakan jumlah dan peratusan kontrak *Large Scale Solar* (LSS) 2 dan 3 yang telah diselesaikan dan langkah-langkah yang telah dan sedang diambil terhadap pihak yang belum lagi memulakan atau menyelesaikan projek LSS 2 dan 3 mengikut syarat-syarat yang ditetapkan oleh Suruhanjaya Tenaga.

JAWAPAN

Tuan Yang di-Pertua,

1. Di bawah Program *Large Scale Solar* Pusingan Kedua (LSS-2), kesemua 27 pemaju di Semenanjung telah berjaya menandatangani Perjanjian Pembelian Tenaga atau *Power Purchase Agreement* – PPA, dengan izin. Manakala, proses menandatangani perjanjian bagi 8 pemaju di Sabah sedang dimuktamadkan dengan Sabah Electricity Sdn. Bhd. (SESB). Pihak Suruhanjaya Tenaga menjangkakan kesemua PPA berkenaan akan ditandatangani sebelum 31 Disember 2021. Bagi Program LSS Pusingan Ketiga (LSS-3), kesemua pemaju projek telah menandatangani PPA.

2. Untuk memastikan kelancaran pelaksanaan projek-projek LSS, pihak Suruhanjaya Tenaga telah menetapkan garis masa dan carta batuan bagi setiap projek yang telah memenangi bidaan LSS. Oleh yang demikian, adalah menjadi tanggungjawab pihak pemaju projek untuk memastikan kemajuan pelaksanaan projek menepati sasaran yang telah ditetapkan supaya projek dapat disiapkan mengikut jadual. Mana-mana pemaju LSS yang tidak mematuhi syarat-syarat yang ditetapkan oleh Suruhanjaya Tenaga boleh dikenakan tindakan termasuk ditarik balik kelulusan projek dan dikenakan penalti atas kelewatan pelaksanaan projek-projek tersebut.

3. Penetapan syarat-syarat dan sasaran-sasaran ini akan dapat memastikan supaya projek-projek ini dilaksanakan mengikut garis masa yang ditetapkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI HAJAH ROHANI BINTI HAJI
ABDUL KARIM (BATANG LUPAR)**

TARIKH : 2 NOVEMBER 2021 (SELASA)

SOALAN

DATO' SRI HAJAH ROHANI BINTI HAJI ABDUL KARIM minta **MENTERI KANAN PENDIDIKAN** menyatakan apakah garis panduan dan langkah keselamatan yang diambil bagi melindungi murid-murid sekolah terutamanya di bawah 12 tahun yang tidak divaksin apabila sesi persekolahan akan dibuka secara fizikal sepenuhnya tidak lama lagi.

JAWAPAN

Tuan Yang di-Pertua,

Kementerian Pendidikan Malaysia (KPM) komited untuk menyediakan persekitaran sekolah yang selamat bagi pengajaran dan pembelajaran (PdP) secara bersemuka.

KPM telah menyediakan Garis Panduan Pengurusan dan Pengoperasian Sekolah 3.0 sebagai rujukan kepada jabatan pendidikan negeri (JPN), pejabat pendidikan daerah (PPD) dan pentadbir serta guru bagi memastikan pengoperasian sekolah berjalan dengan lancar. Garis panduan ini menetapkan supaya guru yang tidak divaksin tidak dibenarkan berinteraksi dengan murid dalam dan luar bilik darjah. Guru tersebut perlu melaksanakan tugas-tugas pengajaran dan pembelajaran (PdP) yang diarahkan oleh pentadbir sekolah dari semasa ke semasa. Selain itu, KPM juga menetapkan hanya anggota kumpulan pelaksana (AKP) dan pekerja perkhidmatan sokongan (PPS) yang lengkap divaksin sahaja dibenarkan memasuki dan bekerja di dalam kawasan sekolah.

KPM turut mewajibkan pemakaian pelitup muka kepada semua warga sekolah, termasuk murid. Murid yang bergejala tidak dibenarkan hadir ke sekolah bagi mengelakkan risiko jangkitan dalam kawasan sekolah. Semua sekolah perlu memastikan pengudaraan yang baik di dalam kelas. Murid akan makan di dalam kelas semasa waktu rehat dengan seliaan guru. Bagi kelas yang menggunakan penyaman udara pula, murid perlu makan di ruang terbuka dengan seliaan guru.

Di samping itu, bagi mengurangkan risiko jangkitan COVID-19 semasa PdP secara bersemuka, KPM telah mengambil ketetapan untuk mengehadkan kapasiti murid di sekolah pada kadar 50 peratus enrolmen keseluruhan. Bagi tujuan tersebut, kaedah yang digunakan adalah dengan mengehadkan kapasiti murid di dalam kelas kepada 50 peratus daripada jumlah murid dalam kelas tersebut. Justeru, sistem penggiliran murid hadir

ke sekolah mengikut minggu akan dilaksanakan. Kaedah ini diguna pakai untuk semua kelas kecuali:

- i. murid berkeperluan khas di SKPK/SMKPK/SMPKV dan PPKI;
- ii. murid di Tingkatan 6 Semester 2 dan IBD Tahun 2;
- iii. murid di sekolah asrama sepenuhnya;
- iv. murid kelas peperiksaan antarabangsa;
- v. murid prasekolah/tadika swasta/pusat perkembangan minda (4-6 tahun); dan
- vi. murid di Sekolah Kurang Murid (kurang 150 murid).

Bagi murid yang akan pulang ke sekolah asrama sepenuhnya, KPM akan melaksanakan ujian saringan COVID-19 menggunakan kit ujian sendiri COVID-19 ke atas murid sebanyak 3 kali, iaitu semasa pendaftaran masuk, hari ke-6 dan hari ke-14. Bagi murid asrama harian, ujian saringan COVID-19 menggunakan kit ujian sendiri COVID-19 akan dilaksanakan semasa pendaftaran masuk. Selain itu, kit ujian sendiri COVID-19 akan disediakan bagi kegunaan sekolah harian untuk membuat saringan awal sekiranya terdapat murid yang menunjukkan gejala ketika di sekolah.

KPM yakin garis panduan yang disediakan serta langkah-langkah yang diambil ini dapat memastikan pengoperasian sekolah secara bersemuka berjalan dengan teratur dalam persekitaran yang selamat dan mengurangkan risiko jangkitan COVID-19.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : PUAN ALICE LAU KIONG YIENG (LANANG)

TARIKH : 2 NOVEMBER 2021 (SELASA)

SOALAN

PUAN ALICE LAU KIONG YIENG minta **MENTERI KANAN PENDIDIKAN** menyatakan sama ada pengenalan tulisan Jawi akan diteruskan dalam buku teks baharu Darjah 6 untuk SK dan SJK. Sekiranya ya, apakah penambahbaikan yang dilaksanakan berbanding zaman PH termasuk isi kandungan dan berapa muka surat dalam buku teks baharu.

JAWAPAN

Tuan Yang di-Pertua,

Kementerian Pendidikan Malaysia (KPM) ingin menjelaskan bahawa penulisan buku teks adalah berdasarkan Standard Kandungan dan Standard Pembelajaran yang terkandung dalam Dokumen Standard Kurikulum dan Pentaksiran (DSKP). Mengikut Akta Pendidikan 1996 (Akta 550), terdapat peruntukan yang menetapkan bahawa Kurikulum Kebangsaan hendaklah digunakan oleh semua sekolah dalam Sistem Pendidikan Kebangsaan.

Untuk makluman Ahli Yang Berhormat, pengenalan tulisan Jawi dalam buku teks baharu Tahun 6 diteruskan seperti yang telah diputuskan dalam mesyuarat Jemaah Menteri pada 14 Ogos 2019. KPM masih mengekalkan enam halaman dalam buku teks Bahasa Melayu bagi sekolah kebangsaan (SK) dan tiga halaman dalam buku teks Bahasa Melayu bagi sekolah jenis kebangsaan (SJK). Pemilihan perkataan tulisan jawi yang diperkenalkan di SJK adalah melibatkan perkataan yang berkaitan kehidupan harian iaitu Selamat Datang, Bahasa Jiwa Bangsa dan Perpustakaan Negara Malaysia.

KPM sentiasa memastikan pelaksanaan pengajaran dan pembelajaran di sekolah bawah KPM adalah mengikut kurikulum yang telah ditetapkan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN

DARIPADA : TUAN NGA KOR MING [TELUK INTAN]

TARIKH : 02 NOVEMBER 2021 (SELASA)

SOALAN

TUAN NGA KOR MING [TELUK INTAN] minta **MENTERI KEWANGAN** menyatakan secara terperinci apakah langkah-langkah yang sedang diambil oleh Kerajaan untuk menyelesaikan hutang dan liabiliti Kerajaan Persekutuan yang kini sudah melebihi paras RM1.3 trilion atau 83.7% KDNK negara.

JAWAPAN

Tuan Yang di-Pertua,

Sehingga akhir Jun 2021, hutang Kerajaan Persekutuan mencatat 958.4 bilion ringgit atau 63.3% berbanding KDNK. Daripada jumlah ini, hutang statutori berjumlah 890.7 bilion ringgit atau 58.8% berbanding KDNK, iaitu masih di bawah had statutori 60% KDNK. Selain daripada hutang Kerajaan Persekutuan, Kerajaan juga menanggung komitmen lain termasuk komitmen jaminan, iaitu hutang syarikat berkaitan Kerajaan yang dijamin dan diberi peruntukan untuk pelaksanaan pelbagai projek infrastruktur dan utiliti awam. Ini termasuklah hutang syarikat 1Malaysia Development Berhad (atau 1MDB) serta liabiliti kewangan lain yang meliputi projek kerjasama awam swasta (atau PPP) dan projek di bawah inisiatif pembiayaan swasta (atau PFI) dan PBLT Sdn. Bhd.. Secara keseluruhannya, kedudukan pendedahan hutang dan liabiliti Kerajaan pada akhir Jun 2021 dianggarkan berjumlah 1.3 trilion ringgit atau 88.1% berbanding KDNK.

Antara faktor peningkatan pendedahan hutang dan liabiliti Kerajaan adalah disebabkan terutamanya oleh pertambahan hutang Kerajaan bagi menampung langkah rangsangan ekonomi untuk menangani kesan krisis pandemik COVID-19. Sementara itu, komitmen jaminan mencatatkan sedikit peningkatan kepada 190.4 bilion ringgit, terutamanya berikutan tambahan jaminan hutang syarikat seperti DanaInfra dan Malaysia Rail Link yang melaksanakan projek infrastruktur pengangkutan awam. Baki hutang prinsipal 1MDB kekal sekitar 32 bilion ringgit manakala liabiliti kewangan lain yang merangkumi komitmen kewangan projek PPP, PFI dan PBLT dianggarkan berjumlah 152.9 bilion ringgit pada akhir Jun 2021. Tuan Yang di-Pertua,

Setakat ini, Kerajaan masih dapat memenuhi semua obligasi pembayaran hutangnya. Kerajaan akan menumpukan usaha kepada langkah memperbaiki kedudukan fiskal dan hutang negara bagi mengawal pendedahan hutang dan liabiliti berkenaan hanya setelah ekonomi pulih dan stabil daripada krisis. Ini adalah untuk memastikan

momentum pemulihan ekonomi tidak terjejas dan golongan yang memerlukan masih terus menerima bantuan.

Dalam tempoh jangka sederhana, Kerajaan akan melaksanakan semula langkah konsolidasi dan inisiatif pengukuhan fiskal, termasuk mengkaji dan menambah baik sistem percukaian sedia ada, memperluas asas hasil, menambah baik pentadbiran cukai, meningkatkan kecekapan perbelanjaan serta penggubalan Akta Tanggungjawab Fiskal bagi mengukuhkan tadbir urus dan disiplin fiskal. Oleh yang demikian, keperluan pinjaman Kerajaan akan dapat dikurangkan dan seterusnya mengawal paras hutang negara. Dalam hal ini, Kerajaan kekal komited terhadap konsolidasi fiskal dalam jangka sederhana, seperti yang digariskan bawah Rancangan Malaysia Kedua Belas dengan defisit fiskal disasarkan berkurang kepada 3.5% berbanding KDNK menjelang 2025.

Secara amnya, bagi mengawal jaminan Kerajaan, ia akan hanya diberikan ke atas pinjaman yang dibuat oleh syarikat berkaitan Kerajaan, badan berkanun dan anak syarikat kerajaan negeri. Tujuan jaminan Kerajaan adalah untuk melaksanakan projek-projek strategik negara yang berimpak tinggi dan memberi manfaat kepada rakyat secara keseluruhan. Di samping itu, bagi mengurangkan risiko liabiliti luar jangka dan memelihara kepentingan Kerajaan, Kerajaan juga telah memperkemaskan terma dan syarat jaminan Kerajaan seperti mengenakan fi jaminan dan syarat debentur ke atas syarikat yang dijamin serta melantik *monitoring accountant*, dengan izin, untuk memantau penggunaan dana pembiayaan yang dijamin Kerajaan. Kerajaan juga sentiasa memantau kedudukan kewangan syarikat dijamin berkenaan dan memastikan pelan pemulihan syarikat terbabit dapat dilaksanakan bagi mengurangkan pendedahan risiko kepada Kerajaan.

Bagi tujuan pelunasan hutang 1MDB, Kerajaan sedang giat melaksanakan aktiviti pemulihan aset 1MDB bagi mendapatkan semula dana yang telah diseleweng. Aktiviti pemulihan aset ini merupakan proses yang rumit dan boleh memakan masa bertahun lamanya. Ini kerana ia bukan sahaja melibatkan kerjasama antara beberapa agensi tempatan dengan agensi asing daripada pelbagai negara, malahan ia turut

melibatkan proses perundangan di mahkamah dan proses rundingan penyelesaian. Setakat September 2021, Kerajaan telah berjaya mendapat semula sejumlah aset 1MDB bernilai 18.2 billion ringgit melalui proses tersebut.

Dalam usaha mengawal paras liabiliti kewangan lain pula, Kerajaan masih menyediakan peruntukan tahunan bagi menyelesaikan komitmen kewangan tersebut. Di samping itu, tiada lagi tambahan pinjaman akan diberikan kepada projek PFI dan PBLT. Bagi projek PPP, Kerajaan sedang dalam usaha untuk merangka model PPP ketiga baharu yang memberi tumpuan kepada projek pembangunan yang dapat dilaksanakan tanpa melibatkan komitmen kewangan daripada Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN PM 22(5)

DARIPADA : DATUK ABD RAHIM BIN BAKRI (KUDAT)

TARIKH : 2 NOVEMBER 2021 (SELASA)

SOALAN

DATUK ABD RAHIM BIN BAKRI (KUDAT) minta **MENTERI KANAN PENDIDIKAN** menyatakan status pelaksanaan projek bangunan gantian Akademik SMK Kanibongan Pitas yang telah terbengkalai lebih 10 tahun akan disiapkan dan apakah perancangan Kementerian dalam melaksanakan projek pembinaan Asrama SMK Kanibongan Pitas dan apakah peruntukan bagi kedua-dua projek ini masih tersedia ataupun telah ditarik balik atau dibatalkan oleh Kementerian Pendidikan

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam usaha menyediakan prasarana dan kemudahan infrastruktur pendidikan kepada semua warga pendidikan di seluruh negara.

Untuk makluman Ahli Yang Berhormat, projek pembinaan SMK Kanibongan Pitas, Sabah telah diluluskan dalam Rancangan Malaysia Ke-10 *Rolling Plan 2* (RP2) tahun 2012 dengan peruntukan berjumlah RM29 juta. Sehingga 31 Oktober 2021, projek ini telah mencapai kemajuan kerja sebanyak 95% dan projek ini dijangka siap sepenuhnya pada bulan Januari tahun 2022.

Selain itu, projek pembinaan asrama SMK Kanibongan Pitas, Sabah dengan kapasiti 200 pelajar lelaki dan 200 pelajar perempuan telah diluluskan dalam Rancangan Malaysia Ke-11 RP 1 tahun 2016 dengan peruntukan berjumlah RM25.6 juta. Projek ini masih dalam peringkat pra bina iaitu dalam proses untuk mendapatkan kelulusan Pelan Pembangunan dan Pelan Bangunan daripada Majlis Daerah Pitas. Setelah kelulusan tersebut diperolehi, projek ini dijangka akan ditender pada bulan Mei 2022.

KPM akan memantau secara rapi pelaksanaan projek ini bagi memastikan murid khususnya di kawasan tersebut mendapat kemudahan pendidikan yang kondusif.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : DATO' DR. MOHD KHAIRUDDIN BIN
AMAN RAZALI [KUALA NERUS]
TARIKH : 02 NOVEMBER 2021 (SELASA)

SOALAN

DATO' DR. MOHD KHAIRUDDIN BIN AMAN RAZALI [KUALA NERUS] minta **MENTERI KEWANGAN** menyatakan tindakan pihak Kementerian bagi menangani peningkatan jumlah wang keluar sehingga menyebabkan negara kerugian melebihi RM1 bilion.

JAWAPAN

Tuan Yang di-Pertua,

Kementerian Kewangan memerlukan sumber rujukan yang lebih jelas berhubung dengan pendedahan yang dibangkitkan. Sekiranya merujuk kepada perkara yang dikeluarkan oleh *Global Financial Integrity* (GFI), laporan mengenai aliran keluar wang haram bagi Malaysia adalah terlebih nyata (*overstated*) serta secara tidak wajar menganggap *errors and omissions* (E&O) yang timbul akibat percanggahan dalam proses kompilasi data sebagai bersamaan dengan aliran kewangan haram.

Walau bagaimanapun, langkah-langkah yang menyeluruh untuk menangani kegiatan haram dan mengurangkan aliran wang haram secara progresif telah dilaksanakan termasuklah:

- i. Aktiviti penguatkuasaan dan pematuhan di bawah Akta Pencegahan Pengubahan Wang Haram, Pencegahan Pembiayaan Keganasan dan Hasil daripada Aktiviti Haram 2001 (AMLA) [Akta 613] dan akta-akta berkaitan yang merangkumi langkah pencegahan dan penguatkuasaan terhadap kegiatan pengubahan wang haram, pembiayaan keganasan dan aktiviti jenayah berat yang lain.
- ii. AMLA bukan sahaja dikuatkuasakan oleh pihak Bank Negara Malaysia (BNM), tetapi turut dikuatkuasakan oleh agensi-agensi penguatkuasaan undang-undang lain seperti Polis Diraja Malaysia, Suruhanjaya Pencegahan Rasuah Malaysia, Jabatan Kastam Diraja Malaysia dan Lembaga Hasil Dalam Negeri. Justeru, tindakan penguatkuasaan termasuk pembekuan dan penyitaan aset yang dimiliki oleh mana-mana individu yang terlibat dalam aktiviti haram, pendakwaan oleh pendakwaraya dan pelucuthakan oleh pihak Mahkamah di bawah AMLA boleh dilakukan oleh agensi-agensi penguatkuasaan yang menjalankan siasatan di bawah Akta yang dikawal selia oleh agensi tersebut.
- iii. Dari segi aktiviti pencegahan, antara peruntukan undang-undang yang dikuatkuasakan di bawah AMLA adalah seperti pengisytiharan mata wang di pintu masuk/keluar negara dan pelaporan mandatori oleh bank-bank berkaitan transaksi tunai yang mana telah dikurangkan daripada RM50,000 kepada RM25,000 berkuatkuasa 1 Januari 2019. Di samping itu, institusi-institusi pelapor dalam Jadual Pertama AMLA, termasuk institusi perbankan perlu mematuhi peraturan pencegahan pengubahan wang haram atau pencegahan pembiayaan keganasan (AML/CFT) serta obligasi pelaporan seperti menjalankan proses usaha wajar pelanggan (*Customer Due Diligence*) dan memfailkan laporan transaksi mencurigakan (*Suspicious Transaction Report*, STR) dan laporan ambang tunai (*Cash Threshold Report*, CTR) kepada BNM.
- iv. Aktiviti penyelarasan dan aktiviti penguatkuasaan bersama juga telah dilaksanakan, terutamanya melalui *National Anti-Financial*

Crime Centre (NFCC) yang menfokuskan kepada jenayah kewangan dan ketirisan sumber negara, di samping aktiviti penguatkuasaan dan kawalan sempadan termasuk pemantauan aliran wang tidak sah.

- v. Berkaitan aktiviti pengiriman wang tanpa lesen, BNM telah meningkatkan pemantauan dan perisikan dalam mengesan aktiviti kiriman wang tanpa lesen. Ini menyumbang kepada peningkatan penguatkuasaan yang menyasarkan aktiviti kiriman wang tanpa lesen samada aktiviti bersindiket dan juga operator-operator runcit. Bagi tempoh 2017 sehingga 2020, tindakan penguatkuasaan telah dipertingkatkan di mana 64 kes telah didakwa di mahkamah, melibatkan lebih RM11 juta jumlah denda dan perlucuthakan harta.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN

**DARIPADA : TUAN NIK NAZMI BIN NIK AHMAD
[SETIAWANGSA]**

TARIKH : 2 NOVEMBER 2021 (SELASA)

SOALAN

TUAN NIK NAZMI BIN NIK AHMAD [SETIAWANGSA] minta **MENTERI KEWANGAN** menyatakan tentang kerangka perundangan yang mengawal selia perjalanan 'nominee' di kalangan pemegang saham.

JAWAPAN

Tuan Yang di-Pertua,

Untuk makluman Ahli Yang Berhormat, pada masa ini, di bawah undang-undang sekuriti, *nominee* bagi pemegang saham syarikat awam tersenarai hendaklah mematuhi kehendak-kehendak seperti yang diperuntukkan di bawah Akta Suruhanjaya Sekuriti Malaysia 1993 [*Akta 671*], Akta Perindustrian Sekuriti (Depositori Berpusat) 1991 [*Akta 453*] dan juga Akta Pencegahan Pengubahan Wang Haram, Pencegahan Pembiayaan Keganasan dan Hasil daripada Aktiviti Haram 2001 [*Akta 613*].

Antara lain, sesuatu *nominee* hendaklah mematuhi kehendak bagi memastikan identiti pemilik sebenar (*end beneficiary/beneficial owner*) melalui proses kenali pelanggan anda (*know your client*) dan juga memastikan maklumat dan rekod berkaitan pemilik sebenar hendaklah disimpan dengan teratur.

Selain itu, pihak Suruhanjaya Sekuriti Malaysia juga boleh meminta kepada sesuatu *nominee* untuk menzahirkan, sekiranya perlu, maklumat mengenai pemilik sebenar saham-saham tersebut. Namun, ini adalah terhad kepada jenis-jenis penzahiran yang dibenarkan sahaja seperti yang diperuntukkan di bawah seksyen 45 Akta 453.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN SHAHAZUKIRNAIN BIN ABD. KADIR
(SETIU)**

TARIKH : 2 NOVEMBER 2021 (SELASA)

SOALAN

TUAN SHAHAZUKIRNAIN BIN ABD. KADIR minta **MENTERI KANAN PENDIDIKAN** menyatakan sumbangan tetap tahunan kepada PIBG sekolah serta perancangan untuk menambah peruntukan khususnya bagi sekolah luar bandar.

JAWAPAN

Tuan Yang di-Pertua,

Kementerian Pendidikan Malaysia (KPM) tidak menyediakan sumbangan tetap tahunan kepada Persatuan Ibu Bapa-Guru (PIBG). Namun, Peraturan-Peraturan Pendidikan (Persatuan Ibu Bapa-Guru) 1998 membenarkan PIBG untuk mengutip apa-apa sumbangan yang diputuskan dalam mesyuarat agung tahunan daripada anggota dan keputusan itu hendaklah dimaklumkan kepada Pengarah Jabatan Pendidikan Negeri yang merupakan Pendaftar Negeri.

KPM yakin dengan peranan yang dimainkan oleh PIBG dalam memastikan kemajuan serta pembangunan murid dan sekolah. Ibu bapa atau penjaga murid adalah digalakkan untuk memberi sokongan kepada PIBG dalam apa-apa juga aktiviti yang dirancang termasuk dalam usaha mendapatkan dana untuk membantu sekolah dalam aspek pengurusan program sekolah.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : DATUK SERI DR. MUJAHID YUSOF
RAWA [PARIT BUNTAR]
TARIKH : 2 NOVEMBER 2021 (SELASA)

SOALAN

DATUK SERI DR. MUJAHID YUSOF RAWA [PARIT BUNTAR] minta **MENTERI KEWANGAN** menyatakan apakah ada peruntukan untuk USJB dalam RMK-12 untuk membayar balik sukuk yang diterbitkan oleh Tabung Haji jika berlaku 'default' sepanjang tempoh yang ditetapkan pembayaran balik.

JAWAPAN

Tuan Yang di-Pertua,

Selaras dengan kelulusan Jemaah Menteri pada 7 Disember 2018 dan 5 April 2019 berhubung Pelan Penstrukturan Dan Pemulihan Lembaga Tabung Haji (TH), aset-aset TH yang tidak berdaya saing telah dipindahkan kepada Urusharta Jamaah Sdn Bhd (UJSB), sebuah syarikat milik penuh Menteri Kewangan Diperbadankan (MKD).

Aset-aset TH ini dipindahkan kepada UJSB pada nilai buku (*book value*) sebanyak RM19.9 bilion dengan nilai pasaran (*market value*) hanya sekitar RM9.7 bilion. Pemindahan aset-aset tersebut dibiayai oleh UJSB melalui:

- i. terbitan Sukuk Murabahah (*zero coupon*) berjumlah RM10 bilion (dengan nilai nominal kira-kira RM13.2 bilion) untuk tempoh 7 tahun

dengan keuntungan pada tarikh matang (*yield to maturity*) sebanyak 4.05% setahun;

- ii. terbitan Sukuk Murabahah (*zero coupon*) berjumlah RM9.6 bilion (dengan nilai nominal kira-kira RM14.3 bilion) untuk tempoh 10 tahun dengan keuntungan pada tarikh matang (*yield to maturity*) sebanyak 4.10% setahun; dan
- iii. penyelesaian tunai sebanyak RM300 juta.

Memandangkan terdapat jurang antara nilai pasaran (*market value*) aset-aset yang diambil alih sebanyak kira-kira RM9.7 bilion berbanding nilai nominal sukuk yang perlu ditanggung oleh UJSB sebanyak RM27.5 bilion, Kerajaan telah bersetuju untuk menyediakan peruntukan kewangan kepada UJSB sebanyak RM500 juta pada tahun 2020 dan sekurang-kurangnya RM17.3 bilion mulai tahun 2021 sehingga tarikh matang sukuk, bagi membiayai *shortfall* penebusan sukuk kepada TH.

Walau bagaimanapun, berikutan kedudukan kewangan Kerajaan pada masa ini semakin meruncing akibat antara lain perbelanjaan pengurusan pandemik COVID-19 yang tinggi, Kerajaan terpaksa mengutamakan keperluan perbelanjaan yang lebih mendesak seperti pembiayaan projek-projek pembangunan yang penting dan kritikal serta pembayaran hutang yang dijamin oleh Kerajaan. Dalam hal ini, peruntukan untuk UJSB bukanlah dibawah kategori mendesak di mana memandangkan bayaran penebusan sukuk kepada TH hanya perlu dibuat pada tahun matang sukuk iaitu 2026 dan 2029. *Default* juga tidak akan berlaku sebelum tarikh matang sukuk-sukuk tersebut.

Sekiranya kedudukan fiskal bertambah baik, Kerajaan akan memastikan bayaran sukuk tersebut dapat dilunaskan lebih awal bagi mengelakkan bebanan kewangan yang besar pada tarikh matang sukuk.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : LISAN

DARIPADA : TUAN PANG HOK LIONG [LABIS]

TARIKH : 2 NOVEMBER 2021 (SELASA)

SOALAN

minta **MENTERI PENGAJIAN TINGGI** menyatakan dengan terperinci senarai Lembaga Pengarah terkini semua Universiti Awam (IPTA) dan senarai nama pelantikan politik (*political appointees*) ke Lembaga Pengarah Universiti masing-masing dari Januari 2020 hingga bulan September 2021.

JAWAPAN

Tuan Yang di-Pertua,

Dalam proses pelantikan ahli-ahli Lembaga Pengarah Universiti (LPU), Peraturan 14(1), Jadual Pertama, Akta Universiti dan Kolej Universiti 1970 (Akta 30) memperuntukkan “Pelantikan ahli Lembaga, kecuali Naib Canselor, hendaklah dibuat oleh Menteri bagi tempoh tiga tahun dan apabila habis tempoh itu, ahli Lembaga itu layak dilantik semula”. Seksyen 13(1) Akta 30 pula menetapkan komposisi keahlian LPU hendaklah mewakili kelompok tertentu yang dapat membantu Lembaga melaksanakan fungsi dengan berkesan.

Justeru, selain wakil-wakil Perkhidmatan Awam yang terdiri daripada pegawai kanan Kementerian Pengajian Tinggi dan Kementerian Kewangan yang bertindak sebagai pemegang taruh utama Universiti

Awam, pelantikan Ahli LPU perlu menepati komposisi yang termaktub di bawah Akta 30 iaitu:

i) Pengerusi LPU

Calon mempamerkan daya kepimpinan dan keupayaan pengurusan yang cemerlang, mempunyai keperibadian unggul, dihormati oleh masyarakat, mempunyai tahap integriti serta akauntabiliti yang tinggi dan telah memberikan banyak sumbangan kepada negara.

ii) Wakil Masyarakat Setempat

Calon dilantik dalam kalangan pemimpin masyarakat setempat atau berasal dari negeri lokasi UA berkenaan. Calon haruslah seorang yang dihormati oleh masyarakat setempat dan berupaya membantu pihak universiti melaksana aktiviti kemasyarakatan serta membawa isu masyarakat untuk diselesaikan oleh pakar-pakar di universiti.

iii) Wakil Senat

Seorang profesor Universiti yang dipilih oleh Senat daripada kalangan ahli yang disebut dalam Peraturan 17(d) Jadual Pertama Akta 30. Kaedah pemilihan wakil Senat dalam LPU adalah melalui proses undian dalam kalangan Ahli Senat dan calon yang terpilih akan dipertimbangkan oleh YB Menteri untuk pelantikan.

iv) Wakil Sektor Swasta

Calon berpengalaman luas dalam tadbir urus organisasi, mempunyai kelayakan akademik atau pengalaman yang bersesuaian dengan bidang tujahan universiti yang diwakili.

v) Wakil Alumni

Calon adalah seorang tokoh yang boleh menjadi contoh ikutan kepada warga universiti khususnya para pelajar dan mampu menggerakkan usaha dalam pengumpulan dana universiti melalui jaringan perhubungan dengan alumni.

vi) Wakil Berpengetahuan dan Berpengalaman

Calon dilantik berdasarkan pengetahuan dan pengalaman dalam bidang tertentu yang bersesuaian dengan bidang tujuan university dan terdiri daripada pegawai universiti berkenaan, bekas pegawai tinggi Kerajaan atau individu lain yang dapat membantu LPU dalam pengurusan universiti.

Bagi tempoh Januari 2020 sehingga September 2021, hanya seramai 96 orang ahli LPU Awam telah dilantik.

KPT juga telah menghasilkan *University Transformation Program* (UniTP) *Greenbook: Enhancing University Board Governance and Effectiveness* sebagai sebahagian daripada dokumen rujukan di bawah Pelan Pembangunan Pendidikan Malaysia (Pendidikan Tinggi) 2015-2025. Buku Hijau ini antara lainnya turut menyentuh perkara-perkara berkenaan saiz dan komposisi LPU, pencalonan Ahli LPU, peningkatan penyertaan wanita dalam LPU, keahlian daripada individu yang mempunyai pendedahan di peringkat antarabangsa dan mempunyai kepakaran dalam bidang pengkhususan tertentu.

Dalam hal ini, KPT mengesahkan bahawa ahli-ahli LPU yang dilantik adalah mematuhi Akta 30 dan turut mengambil kira perkara-perkara yang dinyatakan di dalam Buku Hijau.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : DATO' JOHARI BIN ABDUL (SUNGAI PETANI)

TARIKH : 2 NOVEMBER 2021 (SELASA)

SOALAN

DATO' JOHARI BIN ABDUL (SUNGAI PETANI) minta **MENTERI KANAN PENDIDIKAN** menyatakan sejauh manakah berjayanya program guru yang telah tamat pengajian di Institut Perguruan ditempatkan ke negeri asal mereka. Ini kerana masih ramai guru dari Semenanjung yang dihantar ke Sabah dan Sarawak sedangkan ramai dari negeri-negeri ini yang masih bertugas di Semenanjung.

JAWAPAN

Tuan Yang di-Pertua,

Kementerian Pendidikan Malaysia (KPM) melaksanakan penempatan guru baharu berdasarkan kepada kekosongan perjawatan dan keperluan opsyen di sesebuah negeri. Pada masa yang sama, KPM juga berusaha untuk memastikan guru kelahiran Sabah dan Sarawak diberikan keutamaan untuk ditempatkan di negeri kelahiran mereka kekosongan perjawatan dan keperluan opsyen.

Untuk makluman Ahli Yang Berhormat, bagi tempoh tahun 2018 hingga 2021, seramai 4,014 orang guru yang berasal dari Sabah dan Sarawak daripada 17,718 orang guru baharu lantikan tetap DG41 ditempatkan di sekolah rendah dan menengah dalam negeri kelahiran mereka. Namun, bilangan graduan berasal dari Sabah dan Sarawak masih belum mencukupi untuk memenuhi keperluan opsyen di sekolah bagi dua negeri tersebut. Justeru KPM telah menempatkan seramai 840 orang guru yang berasal daripada semenanjung Malaysia ke sekolah di Sabah dan Sarawak bagi tempoh yang sama untuk memenuhi keperluan opsyen di negeri tersebut.

KPM komited dalam memastikan penempatan guru lantikan baharu dibuat berdasarkan kepada kekosongan perjawatan dan keperluan opsyen bagi memastikan pengajaran dan pembelajaran murid tidak terjejas.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN WONG HON WAI [BUKIT
BENDERA]**

TARIKH : 2 NOVEMBER 2021 (SELASA)

SOALAN

TUAN WONG HON WAI [BUKIT BENDERA] minta **MENTERI TENAGA
DAN SUMBER ASLI** menyatakan usaha pembaharuan undang-undang
yang telah atau sedang diusahakan oleh pihak Kementerian Tenaga dan
Sumber Asli sejak Mac 2020 dan bilakah pembaharuan tersebut akan
dibentangkan di Parlimen.

JAWAPAN

Tuan Yang di-Pertua,

- 1) Kementerian Tenaga dan Sumber Asli (KeTSA) melalui Jabatan Perlindungan Hidupan Liar dan Taman Negara (PERHILITAN) sedang melaksanakan pindaan kepada Akta Pemuliharaan Hidupan Liar 2010 [Akta 716] iaitu Rang Undang-Undang (RUU) Pemuliharaan Hidupan Liar (Pindaan) 2021.
- 2) Setelah sepuluh (10) tahun pelaksanaan Akta 716, PERHILITAN telah mengenal pasti beberapa perkara yang perlu dibuat penambahbaikan ke atas Akta 716. Pindaan ini adalah bagi menambah baik peruntukan-peruntukan sedia ada ke arah meningkatkan lagi perlindungan hidupan liar serta habitatnya. Ini termasuk meningkatkan kadar hukuman dan penalti serta mengukuhkan penguatkuasaan dalam menangani isu-isu semasa seperti perdagangan dalam talian.
- 3) Selain daripada itu, KeTSA melalui Jabatan Ketua Pengarah Tanah dan Galian (JKPTG) sedang menambah baik kerangka perundangan dalam sistem penyampaian perkhidmatan pembahagian pusaka di bawah Akta Harta Pusaka Kecil (Pembahagian) 1955 [Akta 98] iaitu RUU Harta Pusaka Kecil (Pembahagian) (Pindaan) 2021.
- 4) Cadangan RUU ini adalah bagi memperuntukan kaedah dalam membentuk kerjasama strategik antara pihak Kerajaan (JKPTG) bersama autoriti lain yang memainkan peranan sebagai pemain industri di samping memperluaskan definisi harta pusaka kecil yang meliputi semua jenis harta selain peningkatan nilai bidangkuasa.
- 5) Kedua-dua RUU Pemuliharaan Hidupan Liar (Pindaan) 2021 dan Harta Pusaka Kecil (Pembahagian) (Pindaan) 2021 ini telah dibentangkan untuk bacaan kali kedua dan ketiga dalam Mesyuarat Kedua, Penggal Keempat, Parlimen Keempat Belas di Dewan Rakyat pada 26 Oktober 2021 yang lalu. Seterusnya, RUU ini akan dibentangkan dalam Mesyuarat Dewan Negara yang dijangka pada bulan Disember 2021.

6) KeTSA juga melalui Jabatan Perhutanan Semenanjung Malaysia (JPMS) sedang dalam proses melaksanakan pindaan ke atas Akta Perhutanan Negara 1984 [Akta 313]. Cadangan pindaan tersebut akan memberikan penekanan kepada aspek memantapkan penguatkuasaan hutan bagi membanteras kegiatan pengambilan hasil hutan tanpa kebenaran serta meningkatkan kadar denda dan hukuman serta penalti tambahan bagi membendung kesalahan hutan yang merosakkan alam sekitar. Peningkatan kadar hukuman dan penalti ini adalah sebagai salah satu usaha pencegahan (deterrence) kepada masyarakat supaya tidak melibatkan diri dalam jenayah kesalahan hutan.

Tuan Yang di-Pertua,

7) KeTSA juga sedang menggubal RUU Kecekapan dan Konservasi Tenaga sebagai kerangka perundangan untuk mengawal selia dan menyokong pelaksanaan inisiatif kecekapan tenaga secara menyeluruh khususnya untuk pengguna elektrik berintensiti tinggi dalam sektor industri dan komersial. Pada masa ini, draf RUU Kecekapan dan Konservasi Tenaga sedang dalam peringkat semakan akhir di peringkat Jabatan Peguam Negara (AGC).

8) Kedua-dua RUU Perhutanan Negara (Pindaan) dan RUU Kecekapan dan Konservasi Tenaga ini dijangka akan dikemukakan untuk bacaan kali pertama di Parlimen pada tahun 2022.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : LISAN

**DARIPADA : DATO' HAJI MAHFUZ BIN HAJI OMAR
[POKOK SENA]**

TARIKH : 2 NOVEMBER 2021 (SELASA)

SOALAN

DATO' HAJI MAHFUZ BIN HAJI OMAR [POKOK SENA] minta
MENTERI PERTANIAN DAN INDUSTRI MAKANAN menyatakan :-

- a. apakah rancangan untuk mengurangkan kos penternakan ayam dengan menghasilkan pengeluaran makanan ayam; dan
- b. apakah cara bagi memastikan bekalan ayam dan lembu mencukupi dan tidak membebankan pengeluar dan pengguna.

JAWAPAN

Tuan Yang Di Pertua,

Untuk makluman Ahli Yang Berhormat, kos pengeluaran ayam di ladang sebahagian besarnya dipengaruhi oleh harga makanan ayam. Ia menyumbang sebanyak 70% daripada keseluruhan kos pengeluaran. Makanan formula lengkap ternakan ayam dihasilkan dalam negara tetapi menggunakan bahan asas utama seperti jagung bijian dan *soybean meal* yang diimport dari luar negara seperti Brazil, Argentina dan India. Kebelakangan ini, harga jagung bijian import telah menunjukkan peningkatan, seiring dengan kenaikan harga pasaran dunia.

Dalam hal ini, bagi mengatasi isu kebergantungan kepada sumber bahan mentah import, Kementerian Pertanian dan Industri Makanan (MAFI) sedang melaksanakan beberapa pendekatan seperti berikut: -

- i. melaksanakan projek penanaman jagung bijian secara berfasa dengan keluasan tanaman sehingga 80,000 hektar. Inisiatif ini dijangka dapat mengeluarkan jagung bijian tempatan sebanyak 1.44 juta tan metrik menjelang tahun 2033; dan
- ii. menjalankan aktiviti penyelidikan bagi menghasilkan bahan mentah gantian yang bersesuaian sebagai bahan mentah utama dalam penghasilan makanan ternakan khususnya untuk rumusan makanan unggas berasaskan kek isirong sawit (*Palm Kernel Cake – PKC*).

Untuk makluman Ahli Yang Berhormat jua, buat masa ini bekalan ayam/itik dalam negara untuk keperluan rakyat Malaysia adalah mencukupi. Tahap sara diri (SSL) ayam/itik pada tahun 2020 ialah 103.94%. Walau bagaimanapun, bekalan daging lembu/kerbau masih belum mencukupi. Tahap SSL daging lembu/kerbau pada tahun 2020 adalah 20.74%.

Pada masa ini, Kerajaan mengimport sebanyak 161,890 tan metrik bagi tahun 2020 untuk memenuhi permintaan daging lembu/kerbau dalam negara. Bagi memastikan bekalan mencukupi dan SSL daging lembu/kerbau dapat ditingkatkan kepada 50% menjelang 2030, MAFI melalui Jabatan Perkhidmatan Veterinar (DVS) telah melancarkan Pelan Strategik Pembangunan Industri Pedaging Negara (BIF PLAN) 2021-2025 bagi memperkasa industri pedaging Negara supaya lebih berdaya maju, berdaya saing, menguntungkan serta berupaya menarik minat pemain industri (dalaman dan luaran) untuk melabur dalam industri ini.

Untuk memastikan bekalan sentiasa mencukupi dengan harga yang berpatutan kepada pengeluar dan pengguna, MAFI sentiasa mengadakan sesi libat urus bersama dengan pihak berkepentingan seperti Kementerian Perdagangan Dalam Negeri dan Hal Ehwal Pengguna (KPDNHEP), pihak pengilang makanan ternakan dan penternak dalam mencari jalan penyelesaian terbaik yang memberi manfaat kepada semua pihak.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : YB DATUK WIRA DR. MOHD HATTA BIN MD.
RAMLI [LUMUT]**

TARIKH : 2 NOVEMBER 2021 (SELASA)

SOALAN

DATUK WIRA DR. MOHD HATTA BIN MD. RAMLI [LUMUT] minta **MENTERI PELANCONGAN, SENI DAN BUDAYA** menyatakan peratusan pemulihan industri pelancongan berdasarkan jumlah pengunjung berikutan pembukaan semula destinasi pelancongan seluruh negara.

JAWAPAN

Tuan Yang di-Pertua,

1. Berikutan kebenaran rentas negeri dan pembukaan aktiviti pelancongan secara berperingkat di seluruh negara, Kementerian Pelancongan, Seni dan Budaya (MOTAC) giat memantau perkembangan pemulihan industri pelancongan dari semasa ke semasa.
2. Untuk makluman Ahli Yang Berhormat, pelaksanaan Projek Rintis Gelembung Pelancongan Domestik yang dilaksanakan bermula 16 September 2021 di Pulau Langkawi, telah berjaya mencatatkan kedatangan melebihi 100,000 orang pelawat dari seluruh negara dalam tempoh sebulan pelaksanaannya.
3. Susulan kejayaan negara mencapai kadar peratusan 90% populasi dewasa lengkap vaksin, Yang Amat Berhormat Perdana Menteri telah mengumumkan kebenaran aktiviti rentas negeri bermula 13 Oktober 2021 yang lalu. Ini telah membawa khabar gembira kepada penggiat industri kerana rakyat kini boleh melakukan aktiviti pelancongan di seluruh negara dan seterusnya merangsang pemulihan industri.
4. Oleh yang demikian, dalam usaha merancakkan kembali pelancongan domestik, MOTAC telah merancang pelbagai strategi, antaranya pelaksanaan program penebusan insentif dalam bentuk diskaun/rebat/baucar yang ditawarkan kepada pengguna syarikat-syarikat penerbangan, Persatuan Hotel Malaysia (MAH) dan pembelian produk kebudayaan. Berdasarkan pemantauan Kementerian, hampir 40% daripada insentif ini telah ditebus oleh rakyat Malaysia. Jumlah ini dijangka akan terus meningkat dengan pantas dengan mengambil kira pembukaan penuh aktiviti pelancongan dan rentas negeri di seluruh negara.

NO. SOALAN : 33

5. Sementara itu, beberapa tarikan pelancongan seperti muzium, zoo dan beberapa tapak warisan dunia juga dilaporkan telah rancak menerima semula kedatangan pengunjung. Muzium-muzium di bawah Jabatan Muzium Malaysia (JMM) misalnya, telah menerima kunjungan melebihi 47,000 pelawat sehingga 24 Oktober 2021 yang lalu, berikutan kebenaran pengoperasian semula muzium-muzium secara berfasa bermula 7 Ogos 2021. Antara muzium yang terlibat adalah Muzium Negara, Muzium Sungai Lembing, Muzium Tekstil Negara dan Muzium Seni Bina.

6. Pada masa yang sama, Persatuan Hotel Malaysia (MAH) melaporkan bahawa *Average Occupancy Rate* (AOR) bagi hotel-hotel 4 hingga 5 bintang yang berdaftar dengannya di seluruh negara telah meningkat melebihi 30% pada bulan Oktober 2021.

7. Di samping itu, MOTAC turut mengambil maklum laporan *Malaysia Airports* berhubung kenaikan pergerakan penumpang domestik sebanyak 74% bagi bulan September 2021 berikutan kejayaan Projek Rintis Gelembung Pelancongan Domestik Langkawi. Angka ini dijangka akan terus meningkat seiring dengan peralihan fasa-fasa Pelan Pemulihan Negara dan kelonggaran Prosedur Operasi Standard (SOP) yang telah diumumkan oleh Kerajaan.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN CHAN LIH KANG
[TANJONG MALIM]**

TARIKH : 2 NOVEMBER 2021 (SELASA)

SOALAN

TUAN CHAN LIH KANG [TANJONG MALIM] minta **MENTERI PEMBANGUNAN WANITA, KELUARGA DAN MASYARAKAT** menyatakan langkah-langkah yang akan diambil untuk mencegah pusat perlindungan wanita, pusat penjagaan OKU, rumah anak yatim atau rumah orang tua daripada beroperasi tanpa lesen.

JAWAPAN

Tuan Yang di-Pertua,

Kementerian Pembangunan Wanita, Keluarga dan Masyarakat (KPWKM) melalui Jabatan Kebajikan Masyarakat Malaysia (JKM) telah diberi tanggungjawab untuk menguatkuasakan Akta Pusat Jagaan 1993 dan Peraturan-Peraturan Pusat Jagaan 1994.

Terdapat 2 proses bagi sesebuah pusat Jagaan untuk mendapatkan perakuan pendaftaran iaitu:

- 1) Proses mendapat **kelulusan 3 agensi teknikal iaitu Pihak Berkuasa Tempatan (PBT), Jabatan Bomba dan Penyelamat, dan Kementerian Kesihatan Malaysia.**
- 2) Proses mendapatkan **perakuan pendaftaran daripada JKJ.** Mengikut piagam pelanggan JKJ, proses perakuan pendaftaran merujuk pada tempoh 21 hari selepas menerima permohonan lengkap dengan kelulusan 3 agensi teknikal. Dengan ini tiada kes Pusat Jagaan yang tidak mendapat kelulusan setelah memenuhi kelulusan 3 agensi teknikal tersebut.

Semua Pusat Jagaan hendaklah mendapat **kelulusan daripada 3 agensi teknikal iaitu Pihak Berkuasa Tempatan, Kementerian Kesihatan Malaysia dan Jabatan Bomba dan Penyelamat Malaysia** sebelum perakuan pendaftaran dipertimbangkan oleh Jabatan Kebajikan Masyarakat.

Di antara punca sesebuah pusat jagaan **gagal didaftarkan adalah bergantung kepada kelulusan 3 agensi teknikal** berdasarkan keperluan agensi yang telah ditetapkan. Bagi mempermudah dan menggalakkan pusat jagaan untuk mendaftar, JKJ mengadakan **sesi advokasi kepada pengendali pusat jagaan, mesyuarat inter-agensi bersama agensi-agensi teknikal 2 kali setahun di setiap daerah dan negeri, serta jerayawara** di setiap negeri untuk memberi pemahaman dan mudah cara proses pendaftaran Pusat Jagaan di seluruh negara. JKJ melaksanakan program advokasi dan jerayawara secara

berterusan kepada pengendali pusat jagaan dan masyarakat bagi memastikan mereka lebih cakna dan sedar kepentingan mendaftarkan pusat jagaan dengan JKM. **Berdasarkan statistik daripada Januari sehingga September tahun ini, terdapat sebanyak 43 program jerayawara direkodkan telah diadakan di seluruh negara.**

Kementerian juga komited dalam memastikan tindakan penguatkuasaan diambil ke atas pusat jagaan yang tidak berdaftar. Terdapat tiga tindakan penguatkuasaan yang boleh diambil ke atas pusat jagaan tidak berdaftar. Mengikut peruntukan Akta Pusat Jagaan (1993) Pindaan (2007), dinyatakan dalam Seksyen 16A(1) **mengelak atau menyita**. Selain itu, di bawah seksyen 21 pula adalah untuk **pendakwaan** manakala seksyen 21A(1) **pengkompaunan** kesalahan tidak melebihi lima ribu ringgit (RM5,000.00).

Tuan Yang di-Pertua,

Selain daripada yang dinyatakan di atas, Seksyen 18 Akta Pusat Jagaan 1993 juga menyatakan tentang **kesalahan dan penalti** kepada pengendali pusat-pusat jagaan yang gagal mematuhi peruntukan dalam akta ini, apabila disabitkan, boleh didenda tidak melebihi sepuluh ribu ringgit (RM10,000.00) atau dipenjarakan selama tempoh tidak melebihi 2 tahun atau kedua-duanya.

Berdasarkan statistik daripada **Januari 2018 sehingga Ogos 2021, sebanyak 59 tindakan penguatkuasaan** yang telah dikenakan ke atas pusat jagaan tidak berdaftar. JKM berusaha memastikan pusat jagaan tidak berdaftar dapat diminimumkan dengan menjalankan program advokasi dan jerayawara. **Tindakan penguatkuasaan terpaksa diambil ke atas pemilik atau pengusaha yang telah diberikan amaran tetapi masih ingkar untuk mendaftarkan pusat jagaan mereka memandangkan kebajikan dan kesejahteraan penghuni di pusat-pusat jagaan ini yang menjadi keutamaan kepada JKM.**

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : TUAN OSCAR LING CHAI YEW [SIBU]
TARIKH : 2 NOVEMBER 2021 (SELASA)

SOALAN

TUAN OSCAR LING CHAI YEW [SIBU] minta **MENTERI KEWANGAN** menyatakan jumlah cukai produk petroleum yang dituntut oleh Kerajaan Sarawak. Nyatakan jumlah yang dibayar pada tahun 2020 dan 2021.

JAWAPAN

Tuan Yang Di-Pertua,

Untuk makluman Ahli Yang Berhormat, Kerajaan Sarawak telah menguatkuasakan pengenaan cukai jualan 5 peratus mulai 1 Januari 2019 ke atas produk petroleum, seperti minyak mentah petroleum, gas cecair asli, *gas oil*, kerosen dan kondensat.

Bagi tahun 2020, PETRONAS telah membayar cukai jualan produk petroleum kepada Kerajaan Sarawak berjumlah 4.97 bilion ringgit, iaitu termasuk cukai jualan yang tertunggak bagi tahun 2019. Bagi tujuh bulan pertama 2021 pula, PETRONAS telah membayar cukai jualan yang sama sebanyak 1.38 bilion ringgit.

Oleh itu, jumlah keseluruhan cukai jualan produk petroleum yang telah dibayar oleh PETRONAS kepada Kerajaan Sarawak setakat ini adalah berjumlah 6.35 bilion ringgit.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : TUAN SIM TZE TZIN [BAYAN BARU]
TARIKH : 02 NOVEMBER 2021 (SELASA)

SOALAN

TUAN SIM TZE TZIN [BAYAN BARU] minta **MENTERI KEWANGAN** menyatakan perbelanjaan Kerajaan menyediakan kereta rasmi Vellfire kepada Menteri-menteri sejak Mac 2020 hingga sekarang. Berapa jumlah perbelanjaan sewaan sesebuah kereta Vellfire daripada syarikat konsesi Spanco sebulan.

JAWAPAN

Tuan Yang di-Pertua,

Untuk makluman Yang Berhormat, Kerajaan telah memulakan proses penggantian Kereta Rasmi Jawatan bagi Menteri-Menteri Persekutuan daripada model Proton Perdana 2.4L kepada Toyota Vellfire 2.5L bermula April 2021. Kerajaan membayar kos pajakan bulanan Toyota Vellfire 2.5L sebanyak RM5,759.35. Kos pajakan bulanan ini terdiri dari kos sewaan bulanan sebanyak RM4,851.61 dan kos selenggaraan bulanan RM907.74. Sehingga September 2021, Kerajaan telah membayar kos pajakan sebanyak RM1.42 juta kepada Syarikat Konsesi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : DATO' SERI DR. WAN AZIZAH WAN
ISMAIL [PANDAN]
TARIKH : 02 NOVEMBER 2021 (SELASA)

SOALAN

DATO' SERI DR. WAN AZIZAH WAN ISMAIL [PANDAN] minta **MENTERI KEWANGAN** menyatakan langkah-langkah yang diambil untuk mengembalikan simpanan pencarum KWSP ke tahap yang munasabah untuk persaraan mereka nanti, terutama kalangan mereka dengan simpanan kurang daripada RM100,000 selepas pelbagai skim membenarkan mereka mengeluarkan simpanan untuk persaraan bagi mengatasi kemelut kewangan akibat COVID-19.

JAWAPAN

Tuan Yang di-Pertua,

Seperti yang Ahli-ahli Yang Berhormat sedia maklum, program-program pengeluaran khas iaitu i-Lestari, i-Sinar, dan i-Citra telah diperkenalkan oleh KWSP sejak Perintah Kawalan Pergerakan (PKP) dilaksanakan dalam menangani krisis pandemik COVID-19.

Ketiga-tiga pengeluaran ini adalah bagi membantu ahli di bawah umur 55 tahun yang terjejas dari segi pekerjaan dan pendapatan mereka akibat perlaksanaan PKP untuk meneruskan kelangsungan hidup mereka bagi suatu tempoh yang terhad tertakluk kepada baki simpanan KWSP masing-masing. Pengeluaran i-Lestari, i-Sinar, dan i-Citra, telah mengakibatkan sejumlah RM101 bilion telah dikeluarkan dan disalurkan

kepada lebih 7.4 juta ahli, atau lebih daripada separuh jumlah keseluruhan ahli KWSP.

Walaupun pengeluaran tersebut telah memberikan sedikit kelegaan kewangan kepada ahli semasa pandemik dan pelbagai peringkat PKP, jumlah simpanan yang telah dikeluarkan kini telah menyebabkan seramai 6.1 juta ahli mempunyai kurang daripada RM10,000 dalam akaun KWSP mereka, yang mana daripada jumlah tersebut, seramai 3.6 juta mempunyai kurang daripada RM1,000, seterusnya menjadikan mereka lebih rentan dan tanpa perlindungan persaraan.

Selain impak daripada pengeluaran-pengeluaran khas tersebut, antara faktor-faktor lain yang turut menyumbang kepada jumlah simpanan persaraan yang rendah ialah tahap gaji yang rendah, caruman yang tidak konsisten, pengeluaran pra-persaraan daripada Akaun 2 dan kadar kesedaran perancangan persaraan dan celik kewangan yang rendah.

Langkah-langkah mengembalikan simpanan ahli KWSP

Dalam usaha mengembalikan semula simpanan ahli yang telah membuat pengeluaran i-Sinar dan i-Citra daripada Akaun 1, caruman baharu yang diterima daripada ahli-ahli yang terlibat akan dikreditkan ke dalam Akaun 1 sehingga keseluruhan akaun pengeluaran yang diambil daripada Akaun 1 diganti semula sepenuhnya. Setelah itu, pecahan caruman akan kembali kepada 70 peratus untuk Akaun 1 dan 30 peratus untuk Akaun 2.

Selain itu, KWSP telah menyediakan pelbagai saluran untuk ahli menambah simpanan persaraan mereka. Selain caruman berkanun KWSP ke atas upah yang wajib dicarumkan oleh pekerja dan majikan, ahli KWSP boleh menambah simpanan persaraan mereka melalui caruman sukarela sama ada melalui caruman melebihi kadar berkanun ataupun caruman pilihan sendiri.

Caruman sukarela turut boleh dibuat oleh mana-mana pekerja sektor formal, orang yang bekerja sendiri dan mereka yang tidak bekerja seperti pelajar dan suri rumah sehingga RM60,000 setahun di bawah Program i-

Saraan. Bagi golongan yang mencarum sukarela dan berumur di bawah 55 tahun, mereka boleh menikmati insentif atau sumbangan Kerajaan sebanyak 15% daripada caruman tidak melebihi RM250 setahun.

KWSP juga menyedari bahawa kesedaran dan pengetahuan mengenai perancangan kewangan dan persaraan adalah penting dalam pengurusan kewangan untuk hari ini dan masa hadapan. Oleh itu, KWSP telah memperkenalkan *Retirement Advisory Service (RAS)* sejak 2014 yang bertujuan memberi khidmat nasihat dan rundingan mengenai perancangan kewangan dan persaraan. Perkhidmatan ini adalah terbuka kepada ahli dan bukan ahli KWSP. Sehingga kini, seramai lebih daripada 300 ribu ahli telah mendapat khidmat nasihat daripada pegawai RAS KWSP di seluruh negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN

**DARIPADA : PUAN HAJAH FUZIAH BINTI SALLEH
[KUANTAN]**

TARIKH : 2 NOVEMBER 2021 (SELASA)

SOALAN

PUAN HAJAH FUZIAH BINTI SALLEH [KUANTAN] minta **MENTERI KEWANGAN** menyatakan jumlah syarikat yang tersenarai dalam FTSE4Good Bursa Malaysia Index kerana berjaya mengamalkan ESG (*Environmental, Social and Governance*) dan apakah usaha Kementerian untuk meningkatkan jumlah ini.

JAWAPAN

Tuan Yang di-Pertua,

Untuk makluman Ahli Yang Berhormat, jumlah syarikat tersenarai awam (PLC) yang tersenarai di dalam Indeks FTSE4Good Bursa Malaysia adalah 76 syarikat. Ketika indeks ini pertama kali dilancarkan pada Disember 2014, hanya 24 PLC yang tersenarai.

Di samping itu, Bursa Malaysia telah dipertanggungjawabkan oleh Kementerian Kewangan untuk membantu PLC dalam meningkatkan prestasi ESG syarikat melalui inisiatif-inisiatif berikut:

- i. **Menyediakan bimbingan secara komprehensif** melalui Panduan Pelaporan Kelestarian (*Sustainability Reporting Guide*) dan Kit Panduan yang berkaitan serta Panduan Tadbir Urus Korporat;

- ii. **Menjalankan penilaian dan maklum balas** melalui pelaksanaan Kajian Semula Pendedahan Kelestarian (*Sustainability Disclosure Review*) pada setiap tahun untuk menilai pendedahan PLC dan memberi maklum balas mengenai bidang yang perlu diperbaiki;
- iii. **Menjalankan program advokasi** melalui program advokasi untuk PLC bagi menghadapi pelbagai isu / tema ESG yang berkaitan;
- iv. **Menyumbang secara Proaktif untuk memperkukuhkan Tadbir Urus Korporat dan Ekosistem Kelestarian** melalui penglibatan secara aktif dalam pelbagai platform. Di samping itu, Bursa Malaysia juga mendorong pihak berkepentingan dalam pasaran modal lain seperti pelabur institusi untuk memainkan peranan yang signifikan dalam menyokong amalan ESG yang lebih baik oleh PLC; dan
- v. **Menyediakan sumber sokongan lain** melalui BURSASUSTAIN iaitu repositori maklumat setempat berkaitan tadbir urus korporat, kelestarian dan pelaburan yang bertanggungjawab untuk PLC.

Pada bulan April 2021, Suruhanjaya Sekuriti Malaysia (SC) telah mengemas kini Kod Tadbir Urus Korporat Malaysia (MCCG), untuk memberi fokus kepada peranan lembaga pengarah dan pengurusan kanan syarikat dalam pengurusan risiko dan peluang. Usaha ini bertujuan menyokong kemampuan syarikat melalui amalan-amalan terbaik baharu dan garis panduan yang dikemaskini bagi memperkukuhkan budaya tadbir urus korporat PLC.

Antara amalan terbaik yang diperkenalkan dalam MCCG versi yang terkini merangkumi peranan-peranan syarikat seperti berikut:

- i. Kewajiban lembaga pengarah dan pengurusan kanan untuk memastikan pelaksanaan polisi dan amalan terbaik untuk menyokong integrasi ESG antaranya dalam pembentukan strategi dan pengendalian operasi syarikat;

- ii. Syarikat perlu berhubung dan berkomunikasi dengan pihak berkepentingan seperti pekerja, pemegang saham, pelanggan secara jelas dan telus mengenai keutamaan ESG syarikat, termasuk melaksanakan strategi dan prestasi dalam mencapai sasaran ESG syarikat;
- iii. Lembaga pengarah mesti mengambil tindakan yang sewajarnya untuk memastikan mereka terus mengikuti dan memahami isu-isu kemampanan yang berkaitan dengan syarikat dan perniagaannya, termasuklah risiko dan peluang yang berkaitan dengan iklim;
- iv. Penilaian prestasi lembaga dan pengurusan kanan juga harus termasuk aspek menangani risiko dan peluang kelestarian; dan
- v. Pelantikan individu dalam pengurusan kanan yang dipertanggungjawabkan untuk mengendalikan pelaksanaan strategi ESG syarikat secara menyeluruh dalam operasi syarikat.

Pencapaian PLC dalam mengamalkan amalan tadbir urus yang disyorkan dalam MCCG, termasuk yang tersebut di atas dipantau oleh SC dan akan dilaporkan dalam laporan tahunan *Corporate Governance Monitor* yang diterbitkan oleh SC.

Capital Markets Malaysia (CMM), sebuah organisasi bersekutu SC, turut menubuhkan beberapa pusat kecemerlangan dengan tujuan untuk meningkatkan keupayaan industri pasaran modal dalam bidang kelestarian. *Centre for Sustainable Corporations* (CSC) merupakan salah satu pusat kecemerlangan yang pertama sekali telah ditubuhkan di bawah inisiatif ini, bertujuan untuk membina amalan kelestarian di kalangan syarikat tersenarai awam dan juga mengembangkan kepakaran dan menempatkan syarikat-syarikat Malaysia sebagai sasaran pelaburan lestari di kalangan para pelabur.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : TUAN WONG CHEN [SUBANG]

TARIKH : 2 NOVEMBER 2021 (SELASA)

SOALAN

TUAN WONG CHEN [SUBANG] minta MENTERI TENAGA DAN SUMBER ASLI menyatakan:

- a) adakah Kementerian komited untuk menghentikan kesemua stesen jana kuasa arang batu dan beralih kepada gas asli; dan
- b) apakah jangka masa yang dijangka untuk melengkapkan peralihan ini.

JAWAPAN

Tuan Yang di-Pertua,

1. Dalam usaha untuk mengurangkan pelepasan gas rumah hijau dalam sektor elektrik, Kerajaan telah membuat keputusan untuk tidak membangunkan loji jana kuasa arang batu yang baharu setelah loji jana kuasa arang batu sedia ada tamat tempoh operasinya.
2. Bagi loji jana kuasa arang batu sedia ada yang sedang beroperasi, Kerajaan tidak bercadang untuk menghentikan operasi loji-loji tersebut sebelum tamat tempoh Perjanjian Pembelian Tenaga kerana ia akan melibatkan kos yang tinggi di samping memberi implikasi terhadap jaminan bekalan elektrik negara.
3. Untuk makluman Ahli Yang Berhormat, proses peralihan sektor bekalan elektrik ke arah sistem rendah karbon perlu dilaksanakan secara berperingkat agar ia tidak membebankan rakyat dan Kerajaan dapat memastikan bekalan elektrik yang berdaya harap kepada pengguna. Oleh itu, Kerajaan telah menetapkan bahawa operasi loji-loji jana kuasa arang batu sedia ada dengan kapasiti berjumlah 7,000MW akan diteruskan dan apabila loji-loji jana kuasa ini tamat beroperasi, kapasiti tersebut akan digantikan dengan kapasiti penjanaan daripada gas asli dan Tenaga Boleh Baharu.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : LISAN

DARIPADA : PUAN NOORITA BINTI SUAL [TENOM]

TARIKH : 2 NOVEMBER 2021 (SELASA)

SOALAN

PUAN NOORITA BINTI SUAL [TENOM] minta **MENTERI PERTANIAN DAN INDUSTRI MAKANAN** menyatakan sebab-sebab serta langkah-langkah yang diambil oleh pihak Kerajaan bagi membantu para petani di Sabah yang berhadapan dengan kenaikan harga racun rumpai yang mendadak pada masa ini.

JAWAPAN

Tuan Yang Di Pertua,

Untuk makluman Ahli Yang Berhormat, di antara sebab utama yang menyumbang kepada kenaikan harga racun rumpai yang mendadak pada masa ini adalah disebabkan pandemik COVID-19 yang melanda seluruh dunia. Situasi ini telah menyebabkan berlaku:

- i. Pengurangan tenaga kerja yang memberi implikasi kepada jumlah pengeluaran yang rendah dan tidak dapat memenuhi permintaan yang tinggi;
- ii. Kesukaran memperolehi bahan mentah semasa tempoh pandemik;
- iii. Kenaikan kos logistik disebabkan tempoh berlabuh yang perlu mematuhi SOP; dan

- iv. Kenaikan kadar tukaran mata wang asing.

Bagi membantu mengurangkan kesan kenaikan harga racun, Kementerian melalui Jabatan dan Agensi mengambil inisiatif dan langkah-langkah berikut:

- i. Menggalakkan petani mengamalkan Pengurusan Perosak Bersepadu (*Integrated Pest Management*) bagi mengurangkan ketergantungan terhadap racun kimia melalui kawalan secara kultural, kawalan fizikal dan kawalan biologi;
- ii. Menggalakkan dan mempromosikan penggunaan input pertanian berasaskan mikroorganisma berfaedah (*Effective Microorganism*) seperti 'Plant Booster', 'Growth Enhancer' dan 'Bokashi';
- iii. Menggalakkan penggunaan bahan sisa tanaman seperti jerami padi untuk dijadikan baja kompos; dan
- iv. Menjalankan aktiviti pembangunan bagi mendidik petani untuk menggunakan baja dan racun mengikut keperluan dan sukatan yang tepat dengan teknik-teknik yang betul supaya penggunaan baja dan racun adalah berkesan.

Sekian, terima kasih

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN M. KULASEGARAN [IPOH BARAT]

TARIKH : 2 NOVEMBER 2021 (SELASA)

SOALAN

minta **MENTERI KOMUNIKASI DAN MULTIMEDIA** menyatakan usaha yang telah dibuat oleh Kerajaan untuk menggubal undang-undang atau polisi untuk menyokong perkembangan ekonomi gig dan pekerja informal (informal workers) di samping menggalakkan rakyat menceburi serta dimanfaatkan sepenuhnya dalam sektor ini terutamanya dari segi keselamatan sosial pekerja gig dan peluang latihan serta pembangunan yang telah diberikan.

JAWAPAN:

Tuan Yang Dipertua,

Untuk makluman Ahli Yang Berhormat, Kementerian Komunikasi dan Multimedia (KKMM) melalui agensi di bawahnya, Perbadanan Ekonomi Digital Malaysia (MDEC) telah melaksanakan Program eRezeki yang berasaskan kepada model Ekonomi Perkongsian dan Ekonomi Gig dengan matlamat untuk membantu rakyat menjana pendapatan tambahan menerusi kaedah dan aplikasi digital.

Sebagai langkah untuk memastikan keselamatan penyertaan masyarakat di dalam platform-platform Ekonomi Perkongsian/Gig ini, pihak KKMM dan MDEC telah mengambil langkah untuk menyemak dan menentusahkan platform-platform digital yang menjadi penghubung kepada pasaran dan penyedia perkhidmatan. Ini adalah bagi memastikan aspek kesahihan, keupayaan pihak penyedia platform dari segi pasaran,

melaksanakan pembayaran dan menguruskan penyedia perkhidmatan atau pekerja gig yang menyertai platform mereka. Sehingga Jun 2021, sejumlah 133 platform telah ditentukan. Senarai platform-platform ini juga turut diguna pakai oleh pihak PERKESO dan KWSP dalam usaha mempromosikan caruman keselamatan kepada individu-individu pekerja gig yang terlibat.

Berhubung isu perundangan, kawal selia serta cabaran-cabaran dalam usaha memanfaatkan model Ekonomi Perkongsian/Gig untuk pembangunan ekonomi dan menjamin masa hadapan pekerja gig - penelitian dan perbincangan berkaitan definisi pekerja gig, pekerja digital bebas (*digital freelancer*), ejen bebas dan beberapa terma lain yang berkaitan sedang dilaksanakan bersama agensi Kerajaan/pihak yang berkaitan. Penjelasan definisi dan pewujudan takrifan rasmi ke atas terma-terma utama ini di bawah model Ekonomi Perkongsian/Gig akan membantu pelbagai pihak dalam mengenal pasti skim keselamatan dan perlindungan sosial yang inovatif dan anjal, selaras dengan perkembangan teknologi dan model baharu pekerjaan berasaskan platform digital.

Pihak KKMM dan MDEC juga telah mencadangkan penubuhan satu Jawatankuasa Sharing Economy di bawah Kluster Ekonomi di bawah Majlis Ekonomi Digital dan 4IR Negara bagi memastikan pengembangan potensi model Ekonomi Perkongsian/Gig ini dapat dilaksanakan secara terancang dan berkoordinasi. Usaha ini adalah selari dengan perancangan di bawah Rancangan Malaysia Ke-12 untuk menyelaraskan tadbir urus digital dengan lebih baik dalam menyediakan ekosistem yang kondusif bagi pembangunan model Ekonomi Perkongsian/Gig.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN

**DARIPADA : TUAN CHARLES ANTHONY SANTIAGO
[KLANG]**

TARIKH : 2 NOVEMBER 2021 (SELASA)

SOALAN

TUAN CHARLES ANTHONY SANTIAGO [KLANG] minta **MENTERI KEWANGAN** menyatakan jumlah peruntukan Bantuan Prihatin Rakyat dan bilangan isi rumah dan individu yang menerima BPR Julai 2020 hingga Oktober 2021. Adakah ia berdasarkan senarai isi rumah miskin tegar dan mutlak terbaru, dan 580,000 orang di M40 yang tergelincir ke dalam kategori B40 akibat pandemik.

JAWAPAN

Tuan Yang di-Pertua,

Untuk makluman Yang Berhormat, secara keseluruhannya, **9.6 bilion ringgit** telah diperuntukkan untuk Bantuan Prihatin Rakyat (atau BPR) bagi memanfaatkan **8.4 juta penerima** bagi tahun 2021 melibatkan **3.6 juta isi rumah, 1.0 juta warga emas sebatang kara atau tiada pasangan dan 3.8 juta individu bujang**.

Penerima **BPR** yang dikenal pasti turut berada dalam senarai pangkalan data e-Kasih, yang merangkumi golongan miskin tegar dan mutlak, adalah berjumlah hampir 500 ribu, iaitu 420 ribu di bawah kategori isi rumah dan 80 ribu di bawah kategori individu bujang.

Penerima BPR juga turut melibatkan golongan 40% menengah kumpulan pendapatan (atau M40) yang tergelincir masuk ke dalam kategori B40 akibat pandemik COVID-19. Ini terbukti apabila terdapat hampir **500 ribu permohonan baharu dan rayuan BPR yang memenuhi syarat kelayakan dan telah diluluskan** bagi memastikan mereka turut menerima bantuan tunai ini.

Kerajaan sentiasa komited memastikan semua bantuan tunai Kerajaan adalah berkesan dan menepati kumpulan sasaran yang ditetapkan terutamanya golongan yang terjejas akibat COVID-19.

Sekian, terima kasih.